



**Komunikadu Imprensa**

**Distritu Bobonaro**

**22 Janeiru 2016**

**Estudante Eskola Sekundariu Públiku Nú 2 Yamato Malibaca Maliana Primeiraves simu treinamentu kona-ba violensia domestika no violensia hasoru feto**

Iha 19 Janeiru 2015, Judicial System Monitoring Programme (JSMP) fasilita treinamentu kona-ba "Asesu ba Sistema Justisa Formal" ba Estudante sekundariu nú 2 Yamato Malibaca iha, Sub-distritu Maliana, Distritu Bobonaro.

Totál estudante ne'ebé partisipa iha treinamentu ne'e hamutuk 31, kompostu estudante feto 16 no mane 15.

Treinamentu ne'e sobre asuntu sira kona-ba asesu ba justisa formal ne'ebé foka ba kna'ar autór judisiáriu sira, lei aplikavel sira iha Timor Leste ne'ebé iha relasaun ho konseitu Lei Kontra Violénsia Domestika no Kodigu Penal, prosesu halo keixa ba kazu krime violasaun seksuál no violénsia doméstica no diferensia entre krime públiku no semi públiku.

"Treinamentu hanesan meiu ida atu kontinua hasae estudante sira nia koñesementu iha área edukasaun no informasaun legal no oinsa estudante sira bele hatene kona-ba prosesu formal sira hodi nune'e bainhira akontese krime ruma iha sira nia área sira bele ajuda halo prosesu tuir justisa formal ne'ebé iha ona," dehan Diretor Ezekutivu JSMP, Luis de Oliveira Sampaio.

Sr. Raimiro Afonso ne'ebé reprezenta Diretor Eskola ne'e haktuir katak, atividade treinamentu ne'e primeiraves ba estudante sira inklui professor sira rasik. Tanba ne'e sira konsidera katak treinamentu ne'e sei útil tebes ba estudante sira. Durante ne'e seidauk iha organizasaun ruma ne'ebé ba fahe informasaun kona-ba setor justisa liu-liu liga ho krime sira hanesan violasaun seksuál, violénsia sira ne'ebé akontese iha uma laran. Nia subliña katak durante ne'e sira hanoin no konfunde tebes katak kazu sira ne'e bele rezolve tuir dalan tradisionál. Maibe ho treinamentu ne'e sei ajuda sira bele hatene katak violénsia uma laran so bele rezolve deit liuhusi dalan ka sistema formal.

Durante nia intervensaun, nia husu ba estudante sira atu uza didiak tempu ne'e hodi rona no kompriende saida mak treinador sira aprezenta, no bainhira iha duvidas no sei iha buat ruma ne'ebé la klaru, nia enkoraza estudante sira atu husu no halo klarifikasiadaun. Nia mós husu atu estudante sira bele kontinua fahe informasaun sira ne'e ba inan, aman, komunidade no kolegas estudante sira ne'ebé lakonsege partisipa iha treinamentu ne'e.

JSMP observa katak estudante sira hetan difikulidade atu kumpriende kona-ba mekanismu atu prosesu kazu violénsia doméstika no violénsia seksuál. Estudante sira rekoñese durante ne'e violénsia ne'ebé akontese iha uma laran ne'ebé involve sira nia família inklui inan-aman maibe sira la hatene katak ne'e krime no oinsa atu halo keixa. Aliende ne'e sira mós husu kona-ba violénsia seksuál ne'ebé komete husi labarik minoridade oinsa bele prosesu no oinsa ninia responsabilidade ba hahalok ne'ebé nia komete.

Relaciona ho pergunta hirak ne'e, treinador/fasilitador sira klarifika no refere ba artigu 20 Kodigu Penal kona-ba imputabilidade tanba idade no artigu 3 Lei Kontra Violénsia Doméstika katak krime hirak ne'ebé akontese iha uma-laran konsidera nu'udar krime públiku inklui involve inan-aman rasik.

Depois hetan klarifikasiun hosi fasilitador sira, estudante sira hahu komriende kona-ba aktu hirak ne'e no oinsa sira bele prosesu. Aleinde ne'e, fasilitador sira mós apresenta estudu kazu atu sukat oinsa estudante sira nia komprensaun kona-ba materia hirak ne'e.

Treinamentu ensera ho entrega JSMP nia publikasaun sira inklui news letters no brochures ba Sr. Raimiro Afonso reprezenta diretór eskola públiku número 2.

Treinamentu ida ne'e realiza tanba hetan suporta husi **Embaixada Canada iha Indonézia**.

Atu hetan informasaun liutan bele kontaktu ba:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)